

Terceira.-Entrada en vigor.

Este decreto entrará en vigor o mesmo día da súa publicación no *Diario Oficial de Galicia*.

Santiago de Compostela, catro de febreiro de dous mil dez.

Alberto Núñez Feijóo
Presidente

Alfonso Rueda Valenzuela
Conselleiro de Presidencia, Administracións
Públicas e Xustiza

III. OUTRAS DISPOSICIÓNS

CONSELLERÍA DE MEDIO AMBIENTE, TERRITORIO E INFRAESTRUTURAS

*Orde do 9 de febreiro de 2010 sobre a
aprobación definitiva do Plan Xeral de
Ordenación Municipal do Concello de
Touro (A Coruña).*

O Concello de Touro remite o documento do Plan Xeral de Ordenación Municipal para a súa aprobación definitiva, conforme o disposto no artigo 85.5º da Lei 9/2002, do 30 de decembro, de ordenación urbanística e protección do medio rural de Galicia.

I. Antecedentes.

1. Na actualidade o Concello de Touro carece de planeamento urbanístico municipal, polo que son de aplicación subsidiaria as normas provinciais do ano 1991.

2. Con data do 3 de novembro de 2005 a CPTOPT emitíu informe previo á aprobación inicial, de acordo co previsto no artigo 85.1º da LOUG.

3. O Concello de Touro aprobou inicialmente o PXOU na sesión plenaria do día 8 de xuño de 2006, someténdoo a información pública e solicitando os informes sectoriais correspondentes.

4. O Concello Pleno aprobou provisionalmente o PXOM o 7 de novembro de 2007, logo dos informes emitidos polos servizos xurídico e técnico.

5. A Dirección Xeral de Desenvolvemento Sostible (Consellería de Medio Ambiente e Desenvolvemento Sostible) resolveu, con data do 27 de outubro de 2008, declarar a inviabilidade do sometemento do PXOM de Touro aos trámites previstos no artigo 7 da Lei 9/2006, sobre avaliación dos efectos de determinados plans e programas no medio ambiente.

6. A CPTOPT mediante Orde do 9 de febreiro de 2009 acordou, de conformidade co disposto no artigo 85.5º b) da LOUG, non outorgar a aprobación definitiva do Plan Xeral de Touro, instando á intro-

dución das modificacións necesarias para corrixir certas deficiencias.

7. O Pleno do Concello de Touro, en sesión do 23 de outubro de 2009, adoptou acordo de aprobación do documento do PXOM coas rectificacións exixidas pola orde da CPTOPT do 9 de febreiro de 2009.

8. A Dirección Xeral de Calidade e Avaliación Ambiental da CMATI resolveu, con data do 26 de novembro de 2009 facer extensiva a Resolución do 27 de outubro de 2008, da Dirección Xeral de Desenvolvemento Sostible, ao PXOM aprobado no Pleno municipal do 23 de outubro de 2009.

9. Con data do 11 de decembro de 2009 recíbese informe da Dirección Xeral de Aviación Civil do Ministerio de Fomento sobre o PXOM de Touro.

II. Consideracións e fundamentos.

De conformidade co artigo 89 da LOUG, e co artigo 1 do Decreto 316/2009, do 4 de xuño, polo que se establece a estrutura orgánica da Consellería de Medio Ambiente, Territorio e Infraestruturas, a competencia para resolver sobre a aprobación definitiva dos plans xerais de ordenación municipal correspóndelle ao conselleiro de Medio Ambiente, Territorio e Infraestruturas.

A Secretaría Xeral de Ordenación do Territorio e Urbanismo eleva nesta mesma data unha proposta, que se subscribe integramente, en que se fan as seguintes consideracións ao respecto da aprobación definitiva do Plan Xeral de Ordenación Municipal do Concello de Touro:

1. Púidose comprobar que no PXOM aprobado polo Pleno do Concello de Touro o 23 de outubro de 2009 aparecen corrixidas as deficiencias sinaladas na Orde do 9 de febreiro de 2009.

2. As limitacións establecidas para a instalación de torretas e bases de telefonía no territorio municipal suxeitaranse ás consideracións indicadas no informe preceptivo previsto no artigo 26 da Lei 32/2003, xeral de telecomunicacións.

III. Resolución.

Con base no antedito,

RESOLVO:

Primeiro.-Outorgar a aprobación definitiva ao Plan Xeral de Ordenación Municipal do Concello de Touro, de acordo co punto 5 a) do artigo 85 da LOUG, nos termos sinalados nos puntos II.1 e II.2 anteriores.

Segundo.-De conformidade co disposto nos artigos 92 da Lei 9/2002, e 70 da Lei 7/1985, do 2 de abril, reguladora das bases de réxime local, o concello deberá publicar no BOP a normativa e ordenanzas do PXOM.

Terceiro.-Notifíquese esta orde ao concello e publíquese no *Diario Oficial de Galicia*.

Contra esta orde cabe interpoñer recurso contencioso-administrativo ante a sala correspondente do Tribunal Superior de Xustiza de Galicia, no prazo de dous meses, que se contarán desde o día seguinte ao da súa publicación, segundo dispoñen os artigos 10 e 46 da Lei 29/1998, do 13 de xullo, reguladora da xurisdición contencioso-administrativa.

Santiago de Compostela, 9 de febreiro de 2010.

Agustín Hernández Fernández de Rojas
Conselleiro de Medio Ambiente, Territorio
e Infraestruturas

Orde do 12 de febreiro de 2010 sobre a aprobación definitiva da modificación puntual número un do Plan Xeral de Ordenación Municipal do Concello de Vedra (A Coruña).

O Concello de Vedra remite a modificación puntual referida para a súa aprobación definitiva, conforme ao artigo 85.5º da Lei 9/2002, do 30 de decembro, de ordenación urbanística e protección do medio rural de Galicia.

I. Antecedentes.

O Concello de Vedra dispón na actualidade dun Plan Xeral de Ordenación Municipal que foi aprobado definitivamente de forma parcial pola orde desta consellería do 30 de xaneiro de 2007; e de forma definitiva pola orde desta consellería do 8 de maio de 2007.

1. A modificación proposta foi aprobada inicialmente polo Concello en Pleno do 27 de maio de 2008 e sometida a información pública nos termos sinalados no artigo 85.2º. Non foron presentadas alegacións, segundo certificado do 8 de setembro de 2008 ao efecto.

2. A Dirección Xeral de Desenvolvemento Sostible da Consellería de Medio Ambiente decidiu o 7 de maio de 2008 non someter a proposta á avaliación ambiental estratéxica.

3. No expediente figuran os seguintes informes sectoriais:

-Dirección Xeral de Patrimonio Cultural da Xunta de Galicia, informes do 12 de maio de 2009, con observacións e do 31 de agosto de 2009, favorable.

-Dirección Xeral de Ferrocarrís do Ministerio de Fomento: informe do 25 de xuño de 2008, favorable.

-Dirección Xeral de Obras Públicas da Xunta: informe do 1 de xullo de 2008, favorable.

-Demarcación de Estradas do Estado en Galicia, do Ministerio de Fomento: informe do 15 de xullo de 2008, favorable.

4. Os servizos técnicos e xurídicos municipais emitiron os informes previstos no artigo 85.4º LOUG.

5. A modificación foi aprobada provisionalmente polo Pleno municipal do 17 de novembro de 2009.

II. Obxecto e descrición do proxecto.

A modificación ten por obxecto variar a categorización de cinco zonas que forman parte do sistema de equipamentos e dotacións, pasando de solo rústico de protección agropecuaria (Ordenanza R-2) a solo rústico de protección ordinaria (Ordenanza R-1), en concreto:

a) Equipamento na parroquia de Illobre (cemiterio CM-1 e relixioso R-1).

b) Equipamento na parroquia de San Pedro de Vilanova (cemiterio CM-12 e relixioso R-12). Así mesmo, modifica a delimitación para axustala ás parcelas que o integran.

c) Equipamento na parroquia de Vedra (relixioso R-11, cemiterio CM-11 e sociocultural SC-12).

d) Equipamento na parroquia de San Mamede de Ribadulla (cemiterio CM-13 e sociocultural SC-4).

e) Equipamento na parroquia de San Pedro de Sarandón (cemiterio CM-14).

III. Análise da proposta.

Logo de analizar a documentación remitida polo Concello de Vedra e á vista da proposta elevada pola Secretaría Xeral de Ordenación do Territorio e Urbanismo, púidose observar:

1. Razóns de interese público da modificación.

A modificación pretende viabilizar a efectiva execución de equipamentos comunitarios en solo rústico, no lugar previsto polo PXOM.

A previsión de equipamentos constitúe unha razón de interese público nos termos previstos no artigo 94.1º da LOUG.

Análise da proposta.

2.1. Equipamento comunitario na parroquia de Illobre: trátase duns terreos nos cales se sitúan a igrexa parroquial e o cemiterio parroquial de Illobre.

2.2. Equipamento comunitario na parroquia de San Pedro de Vilanova: inclúe tres parcelas. Nas dúas primeiras sitúanse a igrexa e o cemiterio parroquial e a outra aparece vacante.

2.3. Equipamento comunitario na parroquia de Vedra: trátase de tres parcelas completas e de parte doutras dúas parcelas. Nunha delas eríxese a igrexa parroquial de Santa Eulalia de Vilanova. Dúas correspóndense co cemiterio parroquial de Vilanova. E as outras dúas aparecen practicamente vacantes de edificación, a excepción do local social de Santa Eulalia e do cruceiro de Vedra.